



Mahein Nia Lian Nú 42, 22 Novembru 2012

International Stabilisation Force – ISF¹ nia Realizasaun husi 2006 - 2012

Introdusaun

Krizi polítika militar 2006 halo Instituisaun FALINTIL - Forsa Defeza Timor-Leste – F-FDTL no Polisia Nasional Timor-Leste – PNTL kuaze atu naksobu iha momentu ne'e. Buat ne'e, nia hun no abut mai husi protesta petisionariu sira iha lora 24 Abril 2006² iha Palasiu Governu nia oin, implika situasaun siguransa internal besik atu rahun no hamosu perturbasaun orden públiku ne'ebé grave tebes.

Rezultadu husi krizi ne'ebé refere lori polisia no militar Timor-Leste luta (tiru) hasoru malu iha estrada sira iha Dili. Hare'e bá instituisaun rua ne'e nia membru sira se kilat bá malu, ejize Estadu Timor-Leste decide bolu Polisia Organizasaun Nasoens Unidas (ONU) no *International Stabilisation Force – ISF* atu mantein fali ambiente paz no hakmatek.

Bazeia bá Akordu Bilateral hodi establese Estatutu ISF ne'ebé asina entre governu Timor-Leste no Australia, iha Maiu 2006. Akordu ne'e husu ISF atu ajuda governu Timor-Leste hodi restaura siguransa, konfidensia no paz inklui re-stablese fali orden públiku no mos fo apoiu bá assistensia umanitaria nian.³ Tuir akordu bilateral ne'e, forsa polisiál no militar hotu-hotu, nasional no internasional, iha forsa Australia nia komandu.⁴

No tuir pedidiu husi governu Timor-Leste, iha Juñu 2006, Australia diriji Forsa Tarefa Konjunta hamutuk 2.600 liu husi operasaun ASTUTE ne'ebé kompostu husi Komponente Aero, Trestre no Maritima nian. Husi total militar ne'e, mais-menus forsa 1.900 pesoas mak asegura siguransa iha Kapital Dili.⁵ Parte Nova Zelandia haruka militar hamutuk 100 resin⁶, inklui Malazia fornese forsa 200 pesoas.⁷

Maibé numeru *ISF* ne'e hetan redusaun hahu husi 2010 to'o 2012 hela deit membru *ISF* hamutuk 550 pesoas ne'ebé kompostu husi forsa Australia no Nova Zelandia nian hodi fo apoiu bá UNPOL atu asegura siguransa rai laran.⁸ Númeru *ISF* ne'e ki'ik liu kompara ho *Peace Keeping Force – PKF* kompara ho tempu UNMISSET hafoin Timor-Leste hetan independensia total iha 20 Maiu 2002 ne'ebé militar 5000 pesoas inklui observador militar hamutuk 120 pesoas.⁹

Liu husi Mahein Nia Lian Nú 43 ne'e sei halo diskusaun klean kona-bá prezensa *ISF* no ninia realizasaun durante periodu 2006 to'o 2012. Iha relatoriu ne'e Fundasaun Mahein – FM sei relata mos kona-bá realizasaun *ISF* atu restaura siguransa no sasidik sira ne'ebé *ISF* ne'e komete. Inklui mos pontu rekomendasaun atu dezenvolve instituisaun F-FDTL hodi garante estabilidade wainhira *ISF* retira husi Timor-Leste.

¹ Forsa Stabilizasaun Internasional –FSI

² Relatoriu Crisis Group: Meneyelesaikan Krisis Di Timor-Leste. 10 Outobru 2006. Nú. 120.

³ Dokumentus Status Of Force Agreements, Maiu 2006 – Janeiro 2007

⁴ <http://timor-leste.gov.tl/?p=1777&print=1&lang=tp>

⁵ <http://nautilus.org/publications/books/australian-forces-abroad/east-timor/operation-astute/>

⁶ <http://nautilus.org/publications/books/australian-forces-abroad/east-timor/new-zealand/>

⁷ <http://nautilus.org/publications/books/australian-forces-abroad/east-timor/malaysia/>

⁸ <http://photos.state.gov/libraries/timor-leste/788/pdfs/hrr2010.pdf>

⁹ Buletin La'ó Hamutuk Vol. 4, Maiu 2003. Nú 2.p2.

ISF Nia Realizasaun Husi Periodu 2006 – 2012

Nu'udar *International Stabilisation Force* ne'ebé governu Timor-Leste konvida atu ajuda restaura fali situasaun rai laran iha krizi 2006, la'os buat ida ne'ebé fasil. Maske nune'e, liu husi esforsu lubuk balun, *ISF* hatudu duni sira nia komitmentu no profesionalizmu hodi re-estabelese fali ambiente paz no hakmatek liu husi sira nia realizasaun durante hetan mandatu iha 2006 to'o tinan rohan 2012. Iha sesaun ne'e, Fundasaun Mahein sei diskute kle'an kona-bá realizasaun ISF nian hodi ajuda lori fali paz no hakmatek iha povu Timor-Leste nian leet.

a. FSI Nia Apoiu Bá Siguransa Nian

Iha Maiu tinan 2006, liu husi Akordu Bilateral, asinadu entre governu Timor-Leste no Austrália, hodi estabelese fali situasaun siguransa nasional, ISF simu responsabilidade todan ida atu bele fo responde bá proposta governu ne'ebé emenda bá ISF iha momentu ne'ebá.¹⁰

Atu hakotu no kombate movimentu grupu *gang* sira ne'ebé mosu nab-naban iha krizi 2006, iha Janeiro 2007, FSI involve misaun ida ho naran *Gang Task Force* hodi kontrola violénsia entre gang sira ho maneira ne'ebé reativu. FSI hamutuk ho Unidade Formadu Polísia nian (FPU), Polísia ONU (UNPOL), hala'o reasaun rápidu hasoru violénsia entre *gang* sira, hodi hala'o patrulla regulária iha kapital Dili no distritu sira.¹¹

Husi operasaun ida-ne'e nu'udar operasaun boot liu hotu ne'ebé hala'o hasoru *gang* sira, no konsege ka'er lider PSHT¹² no mais-menus membru na'in 47, hadau arma oin-oin, inklui rama-oan ne'ebé halo rasik, dispozitivu ne'ebé kauza inséndiu, farda sira polísia nian, no rádiu sira.¹³

Kestaun siguransa nasional ne'ebé kabe bá problema pestisionariu sira momentu ne'ebá mos tama iha lista operasaun ISF nian. ISF involve direta iha Komandu Operasaun Konjunta (KOK) hodi buka tuir grupu petisionarius iha Sub Distritu no Distritu sira hanesan Aileu, Same, Ainaro, Maliana, Suai no Ermera.¹⁴

Involve mos iha prosesu rekoilla kilat husi petisionarius liu husi Eis Maijor Tara¹⁵ ne'ebé entrega ofisialmente bá ISF iha Gleno,¹⁶ inklui kilat sira ne'ebé konsege espalla to'o ema sivil sira. Atu bele integra lalais situasaun hakmatek ISF hamutuk ho UNPOL¹⁷ halo pasa revista kilat tama sai uma iha distritu sira no kapital Dili hanesan iha Bebonuk¹⁸, inklui transporte públiku no privadu nu'udar resposta ida bá proposta governu, restaura situasaun siguransa nian.¹⁹

Seluk mak atu antisipa espallamentu kilat ilegal iha públiku maka ISF mos halo destroisaun bá kilat ilegal sira ne'ebé sira rekoilla ho liu husi operasaun *joint Task Force 631 (JTF)*²⁰, nomos kilat ilegal seluk iha krizi 2006, liu husi orden Longinhos Monteiro nu'udar

¹⁰ Komunikadu Imprensa: Soru-mutu Konsellu Ministru 23 Setembru 2009.

¹¹ Relatoriu TLAVA: Avaliasaun bá Violensia Armada iha Timor-Leste. Abril 2009. Nú. 2.

¹² Persaudaraan Setia Hati Teratai.

¹³ Relatoriu TLAVA: Avaliasaun bá Violensia Armada iha Timor-Leste. Abril 2009. Nú. 2.p7.

¹⁴ Media STL Edisaun Kinta, 10 Abril 2008.

¹⁵ Naran Marcos da Conceição núdar lider Petisionarius ho diviza Maijor, ikus mai sai deputadu iha sigundu lejizlatura husi Partidu Sosial Demokrata – PSD.

¹⁶ Media Defeza Australia, Edisaun 12 Janeiro 2006.

¹⁷ United Nation Police.

¹⁸ Media Defeza Australia, Edisaun 01 Abril 2008.

¹⁹ http://www.defence.gov.au/op/eastTimor/gallery_2008.htm

²⁰ Media Defeza Australia, Edisaun 11 Agostu 2006.

Perkurador Jeral Republika iha momentu ne'ebá.²¹ Nune'e mos, situasaun instabilidade ne'ebé momentu ne'e da'et ona bá distritu sira, liu husi planu operasaun ASTUTE ISF hala'o patrollamentu no monta baze (postu) to'o iha Sub-Distritu no Distritu sira hanesan parte Leste nian maka Distritu Baucau, Sub Distritu Tutuala-Lospalos inklui Kapital Dili.²² Kapital distritu husi parte Oeste no Norte mos sai mos tarjetu operasaun ISF mak Distritu Ermera-Gleno²³, Distritu Suai, Distritu Maliana no Distritu Balibo²⁴, inklui atu evita infiltrasaun ruma husi nasaun vizinu hanesan Indonezia, ISF mos halo patrollamentu rutina iha Distritu Enclave Oecusse hodi aseguran estabilidade bá povu Timor-Leste.²⁵

ISF nia realizasaun seluk iha momentu ne'ebá mak atu asegura diretu povu Timor- Leste hodi ezerse ninia diretu iha Eleisaun Jeral Prezidensial no Parlamentar 2007. Ho ida ne'e, ISF hala'o siguransa rutina iha teritoriu laran ho patrollamentu kalan no loron iha estrada sira, fatin públiku, bairo sira atu hametin fali unidade no konfiansa bá paz no dame iha públiku, liu husi servisu hamutuk ho governu ho *United Nations Integrated Mission in Timor-Leste* (UNMIT).²⁶

Nune'e mos halo pasa revista bá comunidade sira, transporte públiku no privadu sira ne'ebé halo momvimentu mai kapital Dili no distritu sira, inklui ISF ajuda *Helikotru Black Hawk* hodi halo distribuisaun bulletin votus bá sentru votasaun sira iha area izoladu hanesan parte Distritu Lautem no distritu seluk iha teriotriu Timor-Leste.²⁷ Iha eleisaun jeral prezidensial no parlamentar 2012 nian ISF ho Polisia Nasional Timor-Leste – PNTL no UNPOL²⁸ halo ezersisu hamutuk hodi fornese siguransa durante prosesu festa demokrasia ne'ebé refere.

Parte seluk maka ISF mos halo siguransa iha prizaun Becora ho responsabilidade atu mantein siguransa bá asesu vizitor sira inklui guarda prizoneirus sira. Nu'udar forsa profesional konsege re-establese situasaun siguransa iha distritu Same, hamoris fali movimentu komersiu iha merkadu. Husi involvimentu ISF bá apoiu siguransa ne'ebé sita iha leten tuir Fundasaun Mahein nia hare'e katak hatudu sinal pozitivu tebes husi ISF nia kontribuisaun hodi restaura fila fali siguransa rai laran. Maske durante operasaun membru FSI sira dala barak komete iha violasaun direktus umanus.²⁹

Liu husi esforsu no kontribuisaun FSI nian hodi restaura siguransa rai laran iha momentu ne'ebá, estadu Timor-Leste fo rekuinesementu bá ISF nia servisu hodi entrega medalla solidariedade bá membru *ISF* ne'ebé involve iha operasaun ASTUTE. Iha 2008, estadu Timor-Leste fo medalla bá membru ISF Kontijente *East-Timor Battle Group 4 (ETBG 4)* ne'ebé remata nia misaun bá apoiu siguransa nian³⁰, iha 2009, estadu Timor-Leste, liu husi Prezidenti Republika Jose Ramos Horta kontinua fo medalla bá membru ISF hamutuk 70 ne'ebé remata mos sira nia misaun.³¹

Nune'e mos iha 2010, atual Prezidenti Republika, Taur Matan Ruak ne'ebé momentu ne'e núdar Xefi Estadu Maior F-FDTL apresenta mos medalla solidariedade bá membru ISF husi Australia nian³². No, iha 2011, estadu kontinua fo medalla solidariedade bá ISF hamutuk 66

²¹ Media Defeza Australia, Edisaun 02 Juñu 2008.

²² http://www.defence.gov.au/op/eastTimor/gallery_2009.htm

²³ Media Defeza Australia, Edisaun 08 Agostu 2008.

²⁴ Media Defeza Australia, Edisaun 03 Dezembru 2007.

²⁵ Media Defeza Australia, Edisaun 25 Jullu 2008.

²⁶ Media Defeza Australia, Edisaun 15 Juñu 2007.

²⁷ http://www.defence.gov.au/op/eastTimor/gallery_2007.htm

²⁸ Media Radio Liberdade, Edisaun Tersa, 13 Dezembru 2011.

²⁹ Media STL Edisaun, Tersa, 27 Novembru 2007.

³⁰ http://www.defence.gov.au/op/eastTimor/gallery_2008.htm

³¹ Media Defeza Australia Edisaun 10 Novembru 2009

³² http://www.defence.gov.au/op/eastTimor/gallery_2010.htm

husi Nova Zelandia,³³ Nune'e mos iha 2012, Xefi Estadu Maior F-FDTL, Maijor Jeneral Lere Anan Timur entrega medalla solidariedade bá membru ISF hamutuk 260 pesoas nu'udar rekuinesementu bá kontribuisaun ne'ebé ISF oferta bá nasau ida ne'e.³⁴

b. ISF Nia Apoiu Bá Umanitaria Nian

Apoi uanitaria núdar parte integradu ida husi misaun ISF nian. Tanba ne'e, liu husi sira nia realizasaun hodi fo apoiu bá restaurasaun situasaun siguransa FSI mos fornese apoiu umanitaria nian. Ajuda umanitaria importante ne'ebé ISF halo maka hamutuk ho grupu mediku sira halo evakuasaun bá Eis Prezidenti Republika Jose Ramos Horta wainhira hetan tiru iha atentadu 11 Febreiru 2008 iha ninia rezidensia Metiaut-Dili.³⁵ Apoiu ekipa enjeneria F-FDTL halo vizita bá suku iha Ailembata hodi halo rehabilitasaun bá fatin eskola ne'ebé hetan sunu durante mosu violensia iha iha eleisaun jeral 2007.³⁶

ISF no *Defence Cooperation Program* (DCP) halo parseira ho F-FDTL no *United States Navy* hodi halo rekonstrusaun bá eskola Nu-Laran-Dili.; kombina hamutuk ho F-FDTL no Ministeriu Saúde hodi distribui ajuda emerjensia bá moras sira iha area ruaral durante fulan Abril 2010.³⁷; ISF husi komponente *Timor-Leste Aviation Group (TLAG)* ne'ebé parte ida husi forsa multi-nasional ne'e halo distribuisaun ekipamentu bá teritoriu kona-bá apoiu mediku no evakuasaun bá ema moras sira.³⁸

Wainhira situasaun siguransa hetan mudansa, forsa Australia no Nova Zelandia ne'ebé hola parte iha misaun ISF kontinua servisu makáas hodi fahe informasaun bá comunidade kona-bá oinsa promove moris iha ambiente diak, liu husi vizita bá klinika sira hanesan Oso-Huna-Viqueue³⁹, inklui rehabilita fatin disportu sira. Nune'e mos husi husi unidade *Joint Task Force 631, Military Policeman (1 Military Police Battalion)*, ajuda halo distribuisaun material edukasaun nia husi doador privadu husi Australia bá Organizasaun Naun Governmental – ONG Fundasaun Ahisuan hodi uza bá formasaun maluk timor-oan difisiente sira.⁴⁰

Atu bele konsolidade situasaun siguransa no akumulade comunidade bá ambiente paz no dame liu husi disportu no divertimentu, membru *ISF* ne'ebé ninia baze iha Gleno-Ermera halo rekonstrusaun bá Stadium Gleno nian; liu husi apoiu enjenerian, ISF halo mos rehabilitasaun bá fatin memorial iha Dare, Distritu Dili. Hodi responde bá emerjenjia FSI perpara membru maizumenus 70 pesoas inklui apoiu staff tekniku, staff lojistika, apoiu staff operasional nian ho objetivu atu responde bá emerjenjia ruma ne'ebé comunidade persiza.⁴¹

Atividade umanitaria ne'e mos realiza husi ISF sira ne'ebé koloka bá distritu sira iha teritoriu Timor-Leste nian. Hanesan ekipa husi ISF husi unidade *Charlie Company, Timor Leste Battle Group 5* ne'ebé baze iha Baucau, fo apoiu umanitaria ekipamentus muzikal niani bá Orfanatus Lar de Santa Teresinha.⁴² Nune'e mos apoiu umanitariu seluk mak forsa enejeneria ISF nian servisu hamutuk ho F-FDTL hari'i Klinika iha Uaimori⁴³ durante semana rua ne'ebé involve mos comunidade. Apoiu umanitariu emerjenjia nian iha parte edukasaun

³³ Komunikadu Imprensa Prezidenti Republika: <http://presidenttimorleste.tl/?p=785>

³⁴ <http://thetimornews.com/news/461-fsi-nain-260-simu-medallia-solidariedade-timor.html>

³⁵ Media Defeza Australia, Edisaun 12 Februari 2008.

³⁶ http://www.defence.gov.au/op/eastTimor/gallery_2007.htm

³⁷ Media Defeza Australia, Edisaun 30 Abril 2010.

³⁸ http://www.defence.gov.au/op/eastTimor/gallery_2009.htm

³⁹ Media Defeza Australia, Edisaun 09 Novembru 2009.

⁴⁰ <http://www.defence.gov.au/opEx/global/opastute/images/gallery/2008/0121/>

⁴¹ Media Defeza Australia, Edisaun 12 Februari 2009.

⁴² http://www.defence.gov.au/op/eastTimor/gallery_2009.htm

⁴³ Naran fatin Historiku bá konsolidasaun FALINTIL iha 1999, parte Oeste Timor-Leste nian

nian, ISF involve fo hanorin lian Inglesh iha estudante sekundaria hamutuk 1.200 alunus iha Gleno-Ermera.⁴⁴

FSI kontinua halo rehabilitasaun bá kondisaun fiziku eskola nian hanesan halo rekonstrusaun no loke fila fali eskola iha Metinaro inklui fo doasaun biblia bá Eskola Katolika iha Comoro-Dili liu husi Madre Salesiana, Lubelia Tadel.⁴⁵ Nomos ISF husi komponente *6th Battalion Royal Australian Regiment Charlie Company* hamutuk ho comunidade hodi loke fila fali eskola primaria Bebonuk-Dili.⁴⁶ Seluk mak membru ISF husi komponente enjeneria nian servisu hamutuk ho *31st Marine Expeditionary Unit (31MEU)*, baze iha Okinowa, Japaun, hari'i klase temporariu iha Eskola Primaria Akanunu.⁴⁷

Husi realizasaun ISF iha parte apoiu umanitariu nian ne'ebé Fundasaun Mahein sita iha leten fo duni benefisiu pozitivu bá povu Timor-Leste. Tanba ne'e, governu liu husi representante Sekretariu Estadu Defeza – SED, Diretor Jeral SED, João Corte Real nu'udar rekuinesementu bá kontribuisaun ne'ebé *ISF* hodi restaura siguransa rai laran.⁴⁸

ISF nia Apoiu bá Instituisaun F-FDTL

Prezensa Forsa Stabilizasaun Internasional nu'udar konsekuiensia ida husi krizi polítika militar iha Janeiru 2006, soldadu militar na'in 159 husi F-FDTL asina petisaun ida haruka bá Eis Prezidenti Repúblika Jose Alexandre Xanana Gusmão - atual Primeiru Ministru V Governu Konstitusional. Kontiudu husi petisaun ne'e maka hato'o keixa kona-bá diskriminasaun iha forsas armadas kontra soldadu sira husi rejiaun Oeste nasaun nian (*Ioromonu*) no a favor bá sira ne'ebé husi *Iorosa'e*.⁴⁹ Impaktu husi petisaun ne'ebé hato'o husi petisionariu sira husi parte oeste nian, besik atu hamosu funu sivil, no afeita siguransa internal hodi hamate movimentu orden publiku nian.

Liu husi mandatu ISF nian iha momentu ne'ebá atu asegura estabilidade tuir proposta governu Timor-Leste nian, agenda importante ida atu konsolida instituisaun F-FDTL mak fornese treinamentu tekniku militar nian bá F-FDTL. Rekursu Umanu instituisaun F-FDTL, partikularmente Komponente Naval nu'udar komponente importante iha instituisaun defeza nian hodi kontrola zona maritima tasi-timor maka ISF kordena hamutuk ho fujileiru Estadus Unidus Amerika nian hodi halo ezersisiu hamutuk ho F-FDTL.⁵⁰ Objetivu husi treinamentu bá membru F-FDTL, especialmente Komponente Naval ne'e atu sai núdar forsa ne'ebé modernu no profesional tuir padraun internasional nian atu haburas siguransa rejiaun, aumenta preparasaun no kooperasaun entre nasaun parseiru sira.⁵¹

Nune'e mos ISF ne'ebé lidera husi forsa Australianu ne'e fo formasaun kona-bá pratika oinsa bele dezafia obstaklu iha prosesu navigasaun nian ne'ebé hala'o iha Distritu Vikeke, Timor-Leste.⁵² ISF mos hasa'e kapasidade no kuinesementu bá komandante F-FDTL no membru sira F-FDTL kona-bá oinsa uza kilat kaliber ho seguru, *briefing* husi Serjentu Clive Clarkson, *Townsville-based B Squadron 3rd/4th Cavalry Regiment*.⁵³ Seluk fali mak ISF loke sentru *Specialist Training Wing* bá F-FDTL iha Metinaro.⁵⁴

⁴⁴ Media Defeza Australia, Edisaun 10 Novembru 2008.

⁴⁵ http://www.defence.gov.au/op/eastTimor/gallery_2006.htm

⁴⁶ Media Defeza Australia, Edisaun 12 Janeiru 2007.

⁴⁷ Media Defeza Australia, Edisaun 22 Abril 2008.

⁴⁸ The Timor News, Sigunda, 03 Setembru 2012: <http://thetimornews.com/news/461-fsi-nain-260-simu-medallia-solidariedade-timor.html>

⁴⁹ Relatoriu CIGI: Monitor ba reforma seitor siguransa Timor-Leste. Dezembru 2009, Nú. 1.p3.

⁵⁰ <http://temposemanaltimor.blogspot.com/2010/07/fujileiru-usa-ho-isf-treina-funu.html>

⁵¹ Media Tempo Semanal, Tersa, 15 Jullu 2010.

⁵² Media Defeza Australia, Edisaun 14 Janeiru 2009.

⁵³ Media Defeza Australia, Edisaun 27 Juñu 2007.

⁵⁴ http://www.defence.gov.au/op/eastTimor/gallery_2009.htm

Parte Komponente Trestre ISF fornese treinamentu ka eserisiu ida ho naran *Tactical Rotary Wing Exercise (TACREX)* hodi aumenta kapasidade membru F-FDTL kona-bá militar nian. Nune'e mos liu husi kompetisaun matenek militar nian iha parte tekniku nian ISF mos aumenta kapasidade membru F-FDTL kona-bá sobu kilat no seluk tan.⁵⁵ Inklui hari'i fasilidade bá treinamentu nian, liu-liu kona-bá velocidade Granada nian iha Metinaro.⁵⁶

ISF nia involvimentu iha programa importante sira mak: *Civil and Military Cooperation – CIMIC*, hodi fornese treinamentu bá membru F-FDTL nu'udar promosaun ida iha sentru formasaun *ISF* nian iha Dili.⁵⁷ Nune'e mos liu husi operasaun ASTUTE forsa multi-nasional ne'ebé hola parte iha misaun forsa manutensaun da paz ne'e aumenta kapasidade membru F-FDTL kona-bá tatika militar inklui perpara fasilidade bá fatin treinamentu tiru nian iha Metinaro hodi fasilita F-FDTL, Komponente Trestre nian.⁵⁸

Seluk maka ISF fo apoiu bá Komponente Apoiu Servisu liu husi fasilita servisu enjeneria nian hodi hala'o servisu hamutuk ho F-FDTL hodi prepara fatin treinamentu no hari'i estandarizasaun velocidade granda nian iha Metinaro, ne'e nu'udar fatin ne'ebé ISF no F-FDTL uza halo treinamentu hamutuk.⁵⁹ Seluk mak hari'i sentru kursu enjeneria nian iha Metinaro no oferese treinamentu enjenerian nian bá membru F-FDTL atu involve iha ekipa ISF hodi halo rehabilitasaun bá eskola sira distritu ne'ebé hetan sunu iha krizi 2006, lembransa ida mak eskola iha Suku Com, Distritu Lautem.⁶⁰ Fo treinamentu kona-bá enjenerian no urbanizasaun bá membru F-FDTL Komponente Apoiu Servisu hodi bele implementa iha futuru.⁶¹

Atu bele forma F-FDTL sai nu'udar forsa ida ne'ebé profesional maka durante mandatu ISF konsege involve an iha prosesu ezersisiu hamutuk hodi transfere tatika militar nian bá F-FDTL oinsa bele familiariza ho kilat modernu wainhira atu tiru, realiza kompetisaun tiru ho PNTL ne'ebé parseira ho UNMIT iha sentru treinamentu Metinaro. Ezersisiu seluk mak kona-bá treinamentu sokoru iha Aero-Portu Comoro no ezersisiu hamutuk ho F-FDTL oinsa halo atuasaun hasoru ema sivil halo distroisaun ne'ebé bele hamosu instabilidade. La'os F-FDTL deit maibé mos halo ezersisiu hamutuk ho PNTL kona-bá oinsa halo atuasaun ho rapida tuir tatika nu'udar polisia profesional.⁶²

Liu husi *Defence Cooperation Program (DCP)* hahu 2001 to'o ohin lora forsa Australia fo apoiu bá dezvoltamentu Forsa-Defeza Timor-Leste – FDTL liu husi fornese treinamentu kona-bá lingua, treinamentu tatika militar, treinamentu lideransa, hasa'e kapasidade membru F-FDTL foun, treinamentu disiplina, administrasaun, lojistika, komunikasaun, jestaun no rede servisu militar, fornese asesoria militar iha gabinete Ministeriu Defeza no Siguransa, treinamentu doutrina militar, finansiamentu, badget no seluk-seluk tan.⁶³ Maibé kooperasaun Timor-Leste ho Australia iha área defeza nian ne'ebé durante ne'e hala'o furak tebes no fo ona benefisiu boot bá F-FDTL seidauk iha asina formalmente *Memorandum of Understanding (MoU)* ida ne'ebé bele regula kona-bá kooperasaun ne'e rasik.⁶⁴

Apoiu importante sira ne'ebé ISF fornese hodi haforsa instituisaun defeza, liu-liu F-FDTL hetan fatin as iha governu no povu Timor-Leste nia hakruk no adora, maibé ita mos labele

⁵⁵ http://www.defence.gov.au/op/eastTimor/gallery_2010.htm

⁵⁶ Media Defeza Australia, Edisaun 21 Maiu 2009.

⁵⁷ Media Defeza Australia, Edisaun 18 Abril 2008.

⁵⁸ Media Defeza Austrlia, Edisaun 07 Outobru 2009.

⁵⁹ http://www.defence.gov.au/op/eastTimor/gallery_2009.htm

⁶⁰ Media Defeza Australia, Edisaun 11 Februari 2008.

⁶¹ Media Defeza Australia 05 Maiu 2010.

⁶² Media Defeza Australia, Edisaun 27 Februari 2009.

⁶³ <http://nautilus.org/publications/books/australian-forces-abroad/east-timor/defence-cooperation-program-dcp-timor-leste/>

⁶⁴ Mahein Nia Hanoin Nú 02, 06 Agosto 2012. p14.

kontente deit ho apoiu ISF nian. Tanba tuir Fundasaun Mahein nia monitorizasaun detekta katak implementasaun operacional FSI iha terenu dala-barak halo intimidasaun no presaan bá comunidade inklui halo presegisaun⁶⁵ politika bá militante partidu balun iha momentu ne'ebá. Hahalok at ISF sira nian ne'e hetan rekuinesementu husi Atual Primeiru Ministru Xanana Gusmão katak sempre simu karta husi comunidade kona-bá ISF la respeitu kultura timor hodi tama sai ema nia uma *adat* sira inklui halo patrollamentu ho helikoptru sira ne'ebé ikus mai halo animal sira tauk halai no monu mate hotu.⁶⁶

Sasidik sira Ne'ebé FSI Komete

Nu'udar ISF ne'ebé hetan mandatu iha 2006 mak atu ajuda governu Timor-Leste hodi restaura hikas situasaun siguransa iha momentu ne'ebá. Ho komitementu solidariedade ne'ebé wa'in tebes, ISF ne'e konsege kontribui ona buat pozitivu balun bá dezvoltimentu seitór defeza no siguransa, hahu husi periodu 2006 to'o rohan 2012. Maske nune'e, tuir Fundasaun Mahein nia peskiza konsege deskobre katak iha prosesu operacional nian ISF mos husik hela lembransa metan (at) iha povu Timor-Leste nian leet. Tanba la hatudu sira nia imparasial no independente nu'udar forsa manutensaun bá paz iha tempu refere.⁶⁷

Situasaun siguransa ne'ebé la favoravel iha krizi 2006 halo povu barak sai husi sira nia hela fatin hodi sai refujiadu iha kampu refujiadu sira iha kapital Dili inklui distritu sira.⁶⁸ Liu husi proposta governu Timor-Leste, ISF hetan mandatu hodi salva guarda bá povu no nasaun ida ne'e. Maibé pelu-kontrariu ISF ne'ebé nu'udar forsa profesional no modernu, respeitu diretus umanu komete fali erru boot hodi tiru mate joven ida ne'ebé nu'udar refujiadu ida husi kampu refujiadu Aero Portu – Lafatik - Comoro.⁶⁹

Sasidik seluk ne'ebé komete husi membru FSI durante hetan mandatu mak halo torturasaun bá comunidade Comoro na'in 2 iha 2006 no ikus mai mate tanba sofre moras todan. Aktu ne'e hetan reasaun makáas husi membru Parlamentu Nasional husi Bankada Consellu Nasional Rekonstrusaun Timor – CNRT, Cecilio Caminho. Nomos membru Parlamentu Nasional husi bankada opozisaun ne'ebé konsidera membru ISF nia atuasaun ne'e viola diretus umanus⁷⁰ Nune'e mos joven na'in tolu hanesan Abilio de Fatima, Janeiro no Fernando husi Bairo Kintal Boot sai vitima bá torturasaun ISF ne'ebé to'o ikus sira lori kazu ne'e bá Parlamentu Nasional. Maibé Komandante *ISF* Brigadeiru John Hutchusen rezeita katak ninia elementu la halo torturasaun ne'ebé hamosu reazen husi parte bankada opozisaun FRETILIN iha momentu ne'e.⁷¹

Seluk maka durante operasaun iha distritu Aileu hodi buka tuir grupu petisionariu sira no atu kaer Alfredo Reinaldo ho nia membru sira ne'ebé sei la'o ho kilat, ISF konsege halo rahun Igreja ida iha Aileu, maibé Komandante ISF Brigadeiru Mal Rerden ne'ebé kaer komandu momentu ne'e rezeita katak lae.⁷² Ida ne'e hatudu katak *ISF* viola *Memorandum Of Understanding* – (MoU) ne'ebé asina iha 26 Janeiro 2007 entre governu Timor-Leste ho Australia atu halo prevensaun bá situasaun siguransa ho respeitu soberania, independensia integridade teritoriu no unidade nasional.⁷³

⁶⁵ <http://dir.groups.yahoo.com/group/ETSA/message/7565>

⁶⁶ <http://chaymukia.blogspot.com/2011/10/xanana-fsi-tenke-sai.html>

⁶⁷ Media STL Edisaun, Tersa, 27 Novembru 2007.

⁶⁸ <http://www.cjilt.org/cjilttimor-today/cjilt-opinion/735-tansa-kilat-tarutu-ih-sidade-da-paz-dili>

⁶⁹ <http://dir.groups.yahoo.com/group/ETSA/message/7565>

⁷⁰ FRETILIN Husu Australia Mantein Seguransa Iha TL Kongratula PM Australia Foun: Media STL, 27 November 2007.

⁷¹ <http://manufahi.blogspot.com/2007/10/as-vtimas-de-tortura-pelas-fsi.html>

⁷² Media STL Edisaun, Sigunda, 02 Abril 2007

⁷³ <http://www.laohamutuk.org/reports/UN/07MOU-TL-UN-Aus.htm>

Kestaun seluk mak ISF hakat liu orden governu Timor-Leste nian ne'ebé husu atu ajuda restaura situasaun siguransa tanba membru ISF halo fali atakasaun bá grupu Alfredo⁷⁴ Reinaldo ne'ebé hamate ninia elementu na'in lima iha Gleno.⁷⁵ No pior liu tan membru ISF halo presegisaun bá comunidade iha Manufahi no hatun bandeira partidu FRETILIN nian, inklui se kilat bá lideransa partidu FRETILIN, Lu-Olo no Mari Alkatiri. Aktu ida ne'e bankada Fretilin konsidera nu'udar hahalok ne'ebé viola konstituisaun RDTL, konvensaun Internasional no viola prinsipiu direitus humanus, atuasaun brutal ne'ebé la respeita povu Timor-Leste nia direitu.⁷⁶ Ho hahalok ISF ne'e hetan reasaun husi lideransa Kintu Governu Konstitusional, Primeiru Ministru Jose Alexandre Xanana Gusmão iha memontu ne'ebá.⁷⁷

Bazeia bá diskrisaun sasidik sira ne'ebé ISF komete iha leten, tuir Fundasaun Mahein nu'udar erru boot ne'ebé ISF komete no viola prinsipiu direitus umanus inklui la hatudu sira nia profesional hanesan forsa modernu. Tanba ne'e Fundasaun Mahein husu bá governu atu apriende husi erru hirak ne'e atu sai referensia ida hodi prepara forsa Timor-Leste iha futuro ho profesional no respeitu prinsipiu universal direitus umanus nian.

Saida Mak Governu Presiza Kontinua?

Timor-Leste nu'udar nasaun soberania ne'ebé hari'i ona ninia istituisaun defeza no siguransa governu iha dever no obrigasaun atu hametin no haforsa instituisaun hirak ne'e hodi bele satan netik ameasa internal no esternal nian, hanesan hakerek iha Lei Organiku F-FDTL nian ne'ebé deskreve katak governu maka órgaun ezekutivu bá política defeza nasisonál nian no órgaun superiór ba administrasaun F-FDTL nian.⁷⁸ Tanba F-FDTL nia misaun jenerika⁷⁹ mak atu garante independénsia nasional, integridade territoriál, liberdade ho siguransa populasau nian kontra kualkér ameasa ka agresaun husi liur, tuir orden konstitusional.⁸⁰

Hanesan haktuir Sekretariu Esdatu Defesa DR. Julio Tomas Pinto, katak FALINTIL-Forsa Defeza Timor Leste (F-FDTL) ne'e forsa ida ki'ik maibé profesional atu defende soberania ho integridade nasaun, nomos haforsa tulun umaniataria iha tempu paz ba comunidade ne'ebé persiza. Povu hotu iha Timor-Leste hakarak duni forsa ida ne'e ki'ik iha número maibé knáar boot iha atendentu profesional ba povu iha tempu paz.⁸¹

Ho ida ne'e Fundasaun Mahein husu bá governu atu implementa Planu Dezenvolvimentu Forsa (PDF) hodi haforsa instituisaun F-FDTL, liu-liu Komponente Naval, Komponente Trestre no Komponente Apoiu Servisu nian. Hanesan Komponente Naval governu presiza tau atensaun hodi hasa'e rekursu umanu liu-liu kona-bá navigasaun nian atu bele maneiza didiak roo hirak ne'ebé governu sosa ona. Tanba F-FDTL, partikularmente Komponente Naval mak garante vizilánsia iha maritima (tasi-laran) inklui atividade ilegal sira no tenki salva riku-soin iha tasi laran.⁸² No mos kona-bá tekniku operasionais, tatíka, estratéjia no avaliasaun hodi bele garante profesionalizmu forsa naval nian.⁸³

⁷⁴ Alfredo Reinaldo núdar komadante Polisia Militar ho diviza Maijor ne'ebé ikus mai sai husi kuartel jeral hodi luta hamutuk ho maluk petisionarius ne'ebé lidera husi Gastão Salsinha no ikus mai mate iha atentadu 11 Febreiru 2008.

⁷⁵ Fretilin Duni FSI Sai Husi Timor: <http://dir.groups.yahoo.com/group/ETSA/message/7565>

⁷⁶ Konfrensia Imprensa Bankada FRETILIN: Tersa, 16 Outobru 2007.

⁷⁷ <http://chaymukia.blogspot.com/2011/10/xanana-fsi-tenke-sai.html>

⁷⁸ Lei Organiku F-FDTL Artigu 7 Alinea 1 tinan 2006.

⁷⁹ Misaun Jeral.

⁸⁰ Lei Organiku F-FDTL Artigu 2 Alinea 1 tinan 2006.

⁸¹ Relatoriu Fundasaun Mahein, 18, 18 Abril 2011.

⁸² Lei Organiku F-FDTL Artigu 2 Alinea 2 Versiklu 1, tinan 2006.

⁸³ <http://www.fundasaunmahein.org/2011/04/18/mehi-no-realidade-ba-dezenvolvimentu-no-profesionalizmu-forsa-falintil-fdtl/>

Sorin seluk, Komponenti Trestre FALINTIL-FDTL hanesan mandatu importante iha komandu forsa armada nia hodi asegura estabilidade nasional. Tuir planu forsa 2020 hahu dezenvolvimentu bá komponente ida ne'e nu'udar deskrebe katak; *premeiru* Forsa operasaun Kombate Terestre (Unidade Infantaria Mekanika, Forsa Unidade Espesial, unidade apoiu operasaun helikoptru no operasaun Karu Asaltu), *segundu* Forsa Defeza Terestre mak Unidade Apoiu Operasaun, Unidade Enjeneiru, Unidade Rezerva Estratejiku, Unidade Apoiu Servisu (Lojistika, Komunikaun no Mediku), Unidade Artilleiru no Unidade Kavaleiru.⁸⁴

Maibé Fundasaun Mahein husu bá governu atu kontinua hasa'e kapasidade unidade sira ne'ebé distina iha Komponente Trestre nian atu bele hala'o misaun umanitaria hodi servi comunidade hanesan ISF halo durante ne'e. Tanba povu hotu iha Timor-Leste hakarak duni forsa ida ne'e ki'ik iha número maibé knáar boot iha atendentu profesional bá povu iha tempu paz nian dadaun ne'e.⁸⁵

Komponenti Apoiu Servisu FALINTIL-FDTL liu husi Kompañia Enjeneria, komesa hakat neneik ona liu husi koperasaun Sivil Militar ne'ebé nia misaun importante iha sosiedade ninia leet. Tanba ne'e Fundasaun Mahein husu atu governu kontinua fortifika Komponente Apoiu Servisu hanesan progresu hirak ne'ebé Kompañia Enjeneria F-FDTL hamutuk ho FSI hala'o hodi halo konstrusaun bá fatin eskola sira, ezemplu Eskola Primaria Fatubesi-Distritu Ermera iha tinan 2010.⁸⁶ Hanesan tuir esteitmentu Koronel Falur Rate Laek katak futuru FALINTIL-FDTL treinu la'os atu halo funu maibé treinu hodi dezenvolve nasaun hanesan konstrusaun Eskola Primaria Fatubesi.⁸⁷

Planu governu nian liu husi Sekretariu Estadu Defeza DR. Julio Tomas Pinto katak hahu husi 2011 governu iha ona hanoin tau orsamentu bá FDTL liu-liu Kompañia Enjeneria liu husi Servisu Sivil-Militar atu identifika fatin hodi halo konstrusaun eskola no klinika iha area rurais no presiza aumenta sira nia kapasidade liu-liu bá rekursu humanu.⁸⁸ Fundasaun Mahein (FM) kongratula bá misaun importante ida ne'e, Tanba FDTL la'os deit hala'o misaun defeza nasional maibé aktividade sira seluk bá dezenvolvimentu setór edukasaun.

Ho ida ne'e, Fundasaun Mahein (FM) rekomenda ba governu kontinua investe iha komponenti ida ne'e hodi hala'o nia misaun ne'ebé atu hametin relasaun sivil no militar agora no bá futuru wainhira ISF fila ona bá sira nia rain iha tinan ida ne'e.⁸⁹ Nune'e mos FM rekomenda atu governu kontinua hametin kooperasaun bilateral entre Australia liu husi *Defence Cooperation Program* hodi fo kapasitasaun bá membru F-FDTL iha futuru.⁹⁰

Konkluzau

Liu husi diskusaun ne'ebé deskrebe iha relatoriu ida ne'e, ikus mai Fundasaun Mahein hakarak konklui katak Timor-Leste nu'udar nasaun diretu demokratiku ne'ebé hamrik iha ambiente globalizasaun, presiza hari'i instituisaun defeza ida ho profesional no modernu hodi bele responde bá nesidade progresu mundu globalizasaun nian. Forsa modernu la signifika katak forsa ida ho material ne'ebé avansadu maibé oinsa polítika governu hodi fortifika instituisaun defeza, espesialmente F-FDTL atu perpara rekursu umanu ne'ebé adekuaudu atu nune'e bele involve an iha konstrusaun nasaun nian.

⁸⁴ Planu Forsa FALINTIL-FDTL 2020, p1184-87.

⁸⁵ Relatoriu Fundasaun Mahein, 18, 18 Abril 2011. p1.

⁸⁶ Buletin FALINTIL-FDTL, Edisaun IV/Agustu-Dezemburu 2010.

⁸⁷ Jornal Defeza Nasional, Edisaun Dezemburu 2010-Juñu 2011.p7.

⁸⁸ Jornal Defeza Nasional, Edisaun Dezemburu 2010-Juñu 2011.p7.

⁸⁹ <http://chaymukia.blogspot.com/2011/10/xanana-fsi-tenke-sai.html>

⁹⁰ Mahein Nia Hanoin Nú. 02: <http://www.fundasaunmahein.org/2012/08/06/politika-ministeriu-defeza-no-siguransa-periodu-2007-%E2%80%932012/>

Signifika intermus operasionalmente presiza rekursu umanu ne'ebé kualidade no profesional katak forsa ne'ebé ka'er metin disiplina, respeita direitus humanus no prosidementu seluk ne'ebé hakerek iha natureza militar nian. Nomos, Timor-Leste presiza forsa armada agora dadaun no bá futuru la'os halo funu konvensional maibé oinsa fo kontribuisaun bá dezvoltimentu estadu liu husi apoiu umanitaria no sai forsa bá paz iha mundu rai-klaran.

Rekomendasaun

Fundasaun Mahein nia rekomendasaun maka hanesan tuir mai ne'e;

1. Rekomenda mos bá governu Australia no Timor-Leste kontinua hametin kooperasaun liu husi programa *Defence Cooperation Program* kontinua fo apoiu ba dezvoltimentu instituisaun F-FDTL.
2. Rekomeda bá governu kontinua fortifika instituisaun F-FDTL liu husi koperasaun bilateral ne'ebé durante ne'e hala'o hodi perpara rekursu umanu ne'ebé professional.
3. Rekomenda mos bá governu atu kontinua ho politika dezvoltimentu instituisaun F-FDTL sai forsa bá paz hodi involve iha forsa manutensaun da paz..
4. Rekomenda bá governu kontinua haforsa Komponente Apoiu Servisu hodi perpara rekursu umanu iha area enjeneria nian nune'e bele integra iha atividade ne'ebé hala'o iha comunidade nia leet.

Bibliografia

Dokumentus

Relatoriu Crisis Group: Meneyelesaikan Krisis Di Timor-Leste. 10 Outobru 2006.

Relatoriu CIGI: Monitor ba reforma seitor siguransa Timor-Leste. Dezembru 2009

Konstituisaun Republika Demokratika Timor-Leste – KDRTL,
Buletin La'o Hamutuk Vol. 4, Maiu 2003

Relatoriu TLAVA: Avaliasaun bá Violensia Armada iha Timor-Leste. Abril 2009.

Lei Organiku F-FDTL Artigu 2 Alinea 1 tinan 2006.

Mahein Nia Hanoi Nú. 02, 16 Agosto 2012.

Mahein Nia Lian Nú. 18, 18 Abril 2011.

Media

Media Defeza Australia Edisaun 2006

Media Defeza Australia Edisaun 2007

Media Defeza Australia Edisaun 2008

Media Defeza Australia Edisaun 2009

Media Defeza Australia Edisaun 2010

Media STL Edisaun, Tersa, 27 Novembru 2007

Media STL Edisaun, Sigunda, 02 Abril 2007

Jornal Defeza Nasional Edisaun Dezembru 2010 -Juñu 2011

Media Tempo Semanal, Tersa, 15 Jullu 2010

Media Tempo Semanal, Tersa, 15 Jullu 2010

Media Radio Liberdade, Edisaun Tersa, 13 Dezembru 2011

Internet/Links

<http://www.fundasaunmahein.org/2011/04/18/mehi-no-realidade-ba-dezenvolvimentu-no-profesionalismu-forsa-falintil-fdtl/>

<http://chaymukia.blogspot.com/2011/10/xanana-fsi-tenke-sai.html>

<http://www.cjitl.org/cjitltimor-today/cjitl-opinion/735-tansa-kilat-tarutu-iha-sidade-da-paz-dili>

<http://temposemanaltimor.blogspot.com/2010/07/fujileiru-usa-ho-isf-treina-funu.html>

<http://thetimornews.com/news/461-fsi-nain-260-simu-medallia-solidariedade-timor.html>

<http://timor-leste.gov.tl/?p=1777&print=1&lang=tp>

<http://www.defence.gov.au/oscdf/adf-posture-review/docs/ops.pdf>

<http://manufahi.blogspot.com/2007/10/as-vtimas-de-tortura-pelas-fsi.html>

<http://nautilus.org/publications/books/australian-forces-abroad/east-timor/defence-cooperation-program-dcp-timor-leste/>

<http://photos.state.gov/libraries/timor-leste/788/pdfs/hrr2010.pdf>